

DOMINGU XXV TEMPU KOMÚN – TINAN B

TEMA

Liturjia Domingu da-25 konvida fiar-na'in sira atu husik “sabedoria mundu nian” no hili “sabedoria Maromak nian”. “Maromak nia sabedoria” de'it – testu bíbliku domingu ne'e nian hateten – fó possibilidade ba ema atu iha asesu ba moris nakonu. Ba ksolok ne'ebé la nahas. *Evanjellu* apresenta mai ita istória ida konfrontu nian entre “Maromak nia sabedoria” ho “mundu nia sabedoria”. Jezús nakonu ho Maromak nia lójika, dispostu atu aseita Aman nia projetu no halo nia vida don ida domin nian ba ema sira; eskolante sira, nakonu ho lójika mundu nian, iha difikuldade atu komprende opsaun ne'e no kompromete an ho projetu ida-ne'e. Maski nune'e, Jezús aviza sira katak, ba sira ne'ebé rona Maromak nia dezafiu no aseita halo sira-nia vida servisu ba maun-alin sira, liuliu ki'ik sira, haraik-an sira, kiak sira, mak hetan fatin iha comunidade sarani.

Leitura daruak ezorta fiar-na'in sira atu moris conforme “Maromak nia sabedoria”, basá nia de'it maka bele lori ema ba enkontru ho moris nakonu. Nia kontráriu, vida ida tuir kritériu sira “sabedoria mundu nian” sei hamosu violénsia, divizaun/diskórdia sira, konfliktu sira, ksolok-laek, mate.

Leitura dahuluk fó hanoin katak hili “Maromak nia sabedoria” provoka mundu nia rai-kunan. Biar nune'e, taterus la bele dezanima sira ne'ebé hili “Maromak nia sabedoria”; persegisaun maka konsekuénsia naturál husi koerénsia moris nian.

LEITURA I – Sab 2,12.17-20

AMBIENTE

“Livru Sabedoria nian” maka livru resente liu Testamentu Tuan nian (mosu iha sékulu I mK). Ninia autór – judeu ida lia-gregu nian, karik moris no hetan edukasaun iha Diáspora (Alexandria?) – hodi esprime an ho liafuan no konseitu mundu gregu nian, hahí “sabedoria” israelita, haktuir kuadru sorte nian ne'ebé ema “justu” no ema “aat” hein iha mundu seluk no deskreve (ho ezemplu foti husi istória Ézodu nian) sorte oioin ne'ebé pagaun sira (adora lulik) no ebreu sira (fiar Jahwéh) iha.

Ita iha Alexandria (Ejitu), iha meiu ida ne'ebé elenizmu mak domina. Kultura sira seluk – katak judaika – la hetan valorizasaun no ema hewai. Kolónia boot judaika ne'ebé hela iha sidade ne'e, durante Ptolomeu Alexandre (106-88 mK) no Ptolomeu Dionísio (80-52 mK) nia reinu, sofre persegisaun maka'as. Matenek eléniku sira buka hatudu, husi parte ida, kultura grega nia superioridade no husi parte seluk, inkongruénsia judaizmu nian no ninia proposta moris nian... Sira buka dada judeu sira atu husik sira-nia fiar, atu “moderniza an” no loke an ba valór furak kultura elénika nian.

Iha ambiente ida-ne'e mak autór matenek-na'in Livru sabedoria nian deside atu defende nia Povu nia valór sira, fiar no kultura nian. Ninia iha objetivu maruak: hodi diriye an ba nia kompatriata judeu sira (moris iha paganizmu, idolatria, imoralidade nia leet), nia konvida sira atu deskobre filafali beiala sira nia fiar no valór judaiku sira; hodi diriye ba pagaun sira, nia konvida

atu sira haree idolatria ninia folin-laek no adere ba Jahwéh, Maromak loos mesak... Ba sira hotu autór hakarak husik ensinamentu fundamentál ne'e: Jahwéh de'it maka garante "sabedoria" loos no ksolok loos.

Testu ne'ebé propoin mai ita halo parte ba parte dahuluk livru nian (kf. Sab 1-5). Iha-ne'ebá, autór refleto kona-ba ema "justu" no ema "aat" sira nia destinu.

MENSAJEN

Ema "aat" sira ne'ebé autór temi, maka pagaun sira inimigu ba judeu sira ne'e no lori moris ida korrupsaun no imoralidade nian, zomba judeu sira nia kostume no valór relijiozu sira; sira mós, konserteza judeu apostata (nega fiar) sira, ne'ebé husik sira nia an atu kultura grega kontamina sira, la tuir ona tradisaun beiala sira-nian no konsidera relijiaun judaika ni'udar konjuntu ida tradisaun obskurantista (moris nakukun/atrazadu nian), ladi'ak ba "modernidade".

Ema "justu" sira nia moris tuir valór Maromak nian ho forma koerente ho sira-nia fiar, maski ema rai kunan ba sira, sai inkómodu ida no interpelasaun maka'as ba ema "aat" sira. Koerénsia, onestidade, vertikalidade no fidelidade ema "justu" sira nian sai aitarak permanente ne'ebé hakanek ema "aat" sira-nia konxiénsia.

Ema "aat" sira nia reasaun hatudu ho forma oiain hanesan persegisaun, tau-lasu, trata-aat, tortura no, hahohok/ asasíniu. Ne'e maka realidade ida ne'ebé ema "justu" sira husi tempu hotu koñese didi'ak.

Entaun. Ita bele dehan katak ema "justu" nia moris maka frakasu ida? Vale ka lae enfrenta persegisaun no sai fiél nafatin ba Maromak no ninia proposta sira? Testu ohin nian la hatán ba pergunta sira-ne'e; maski nune'e, Livru Sabedoria nia autór sei dehan iha oin tan, katak fidelidade ema justu nian sei hetan rekompensa no sei hetan moris nakonu ne'ebé Maromak rai hela ba sira ne'ebé tuir Nia dalan moris nian.

LEITURA II – Tiago 3,16-4,3

AMBIENTE

Konvida hotu tiha fiar-na'in sira ba autentisidade no koerénsia fiar nian (kf. Tg 1,2-27) no husu sira atu esprime fiar ho atitude konkreta sira (kf. Tg 2,1-24), autór Surat Tiago nian halo lista, iha parte datoluk surat ne'e nian (kf. Tg 3,1-4,10), série ida aspetu partikulár sira ne'ebé presiza fiar-na'in sira-nia atensaun no kuidadu.

Aspetu partikulár sira-ne'e maka kestaun no situasuan sira ne'ebé inkomoda komunidadade sarani sira husi orijen judaika, destinatáriu surat nian. Aspetu partikulár dahuluk refere ba kuidadu ho nanál (kf. Tg 3,1-12); ida daruak refere ba nesesidade atu rejeita "mundu nia sabedoria" no hakohak "sabedoria mai husi leten" (kf. Tg 3,13-18); aspetu datoluk mak análize ida kona-ba diskórdia (divizaun) ne'ebé sai venenu ba komunidadade sarani sira nia moris (kf. Tg 4,1-10).

Autór nia objetivu maka purifika ezisténsia kristán no ezorta sarani sira atu keta lakon valór sarani auténtiku sira.

MENSAJEN

Mensajen dahuluk ita-nia testu nian (kf. Tg 3,16-18) ezorta fiar-na'in sira atu moris tuir "Maromak nia sabedoria".

"Mundu nia sabedoria" hahoris laran-moras, istori-malu, falsidade (kf. Tg 3,14), rivalidade, dezorden no hahalak aat oioin (kf. Tg 3,16). Ikusmai nia harahun ema nia moris no impede atu iha komuñau ho maun-alin sira. Ne'e "sabedoria" ida inkompátivel ho ezijénsia sira adezaun nian ba Kristu.

Iha kontráriu, "Maromak nia sabedoria" iha karakteristiká pureza nian, pasífika, komprensiva, nakonu ho laran-luak no hahalok di'ak, imparsiál no laho ipokrizia (Tg 3,17). Iha kualidade hitu sabedoria nian ne'ebé haktuir iha ne'e: tanba númeru ne'e signifika perfeisaun, plenitude, autór Surat Tiago nian hakarak propoin ba fiar-na'in sira dalan ida perfeisaun nian, realizasaun total nian, moris nakonu nian. Se sarani ida hakarak moris iha pás (katak iha komuñau) ho Maromak, tenke hakohak "Maromak nia sabedoria" no ho nia vida halo tuir iha ain-hakat ida-idak nia moris nian.

Iha parte daruak ita-nia testu nian (kf. Tg 4,1-3), autór analiza kauza sira ba situasaun konfliktu no diskórdia/divizaun nian ne'ebé mosu iha comunidade barak no inkompátivel ho ezijénsia kompromisu nian ho Kristu. Ne'e tanba fiar-na'in sira seidaun interioriza Kristu nia proposta. Envezde halo sira nia vida, hanesan Kristu, prezente ida domin nian ba maun-alin sira, no tradús iha jestu konkretu partilla nian, servisu nian, solidariedade nian, fraternidade nian, fiar-na'in sira-ne'e taka an iha sira-nia egoízmu no orgullu.

Sira-nia fuan kaanteen, laran-moras, iha hakaran atu hanehan ema seluk... No "paixaun" sira-ne'e hatudu fali iha nivel comunidade ho atitute funu nian, laran-moras nian, rivalidade nian, arrogánsia nian, hirus nian. Sira moris tuir "sabedoria mundu nian" no la'ós tuir "sabedoria Maromak nian".

Naturalmente, Maromak la rona sira-nia orasaun... buat ne'ebé sira husu atu satisfás de'it sira-nia neseseidade materiál, sira-nia paixau, orgullu, kaanteen, vontade atu domina ema seluk. Orasaun ne'ebé nia baze mak egoízmu Maromak la bele rona.

ALELUIA – kf. 2Tes 2,14

EVANJELLU – Mc 9,30-37

AMBIENTE

Preokupasaun esensiál Marcos nian iha parte daruak ninia Evanjellu nian (kf. Mc 8,31-16,8) mak apresenta Jezús nu'udar "Maromak nia Oan". Biar nune'e, Marcos kuidade liu atu hatudu katak Jezús la mai mundu atu kumpre destinu triunfu no glória umana nian, maibé atu kumpre Maromak nia vontade no oferese ninia vida nu'udar prezente domin nian ba ema sira. Iha kontestu ida-ne'e maka ita tenke lokaliza anúnsiu tolu ne'ebé Jezús halo kona-ba nia paixau no mate (kf. Mc 8,31-33; 9,30-32; 10,32-34).

Testu ne'ebé ohin propoin mai ita iha domingu da-25 maka, anúnsiu daruak ninia paixau no mate nian. Grupu ne'e husik tiha ona Cesareia Filipe (evanjellu domingu kotuk) no agora liu hela iha Galileia. Karik nia atu bá Jerusalém no eskolante sira konxiente katak nia destinu sei hatudu iha ne'ebá. Iha faze ida-ne'e, sira hotu sira fiar katak Jezús sei tama iha sidade ho papél Mesias polítiku nian, kbiit-na'in no manán-na'in, ho kbiit atu liberta Israel, husi romanu sira nia ukun.

Iha dalan ba Jerusalém, Jezús halo katekeze ba eskolante sira, hodi hanorin valór sira Reinu nian no hatudu ba sira, ho jestu konkretu, katak Aman nia projetu la liu husi eskema podér no domíniu nian. Ita-nia testu halo parte ba instrusaun sira Jezús fó ba eskolante sira. Sira bele komprende ka lae Maromak nia lójika no prontu atu bá hamutuk ho Jezús, iha aventura Reinu nian?

MENSAJEN

Testu fahe ba parte rua. Iha parte dahuluk, Jezús haklaken ninia paixaun ne'ebé mai daudaun, iha Jerusalém; parte daruak, Jezús hanorin ba eskolante sira lójika Reinu nian: ida-ne'ebé boot liu sai ema hotu nia atan.

Iha parte dahuluk (vers. 30-32), Marcos tau iha Jezús niaibun anúnsiu daruak ninia paixaun, mate no moris-hi'as ho liafuan muda uitoan husi anúnsiu dahuluk (kf. Mc 8,31-33), maibé ho konteúdu hanesan. Jezús nia liafuan denota hakmatek no aseitasaun serena faktu sira nian ne'ebé sei konkretiza iha tempu mai. Jezús simu husi Aman misaun atu propoin ba ema sira dalan ida realizasaun nakonu nian, ksolok rohan la'ek; no Nia sei halo ne'e, maski tenke liu husi krús. Jezús nia hakmatek mai husi aseitasaun totál no konformidade absoluta ba Aman nia projetu sira.

Eskolante sira mantein silénsiu estrañu hasoru anúnsiu ne'e. Marcos esplika katak sira la komprende Jezús nia linguajen no ta'uk atu husu Nia (vers. 32). Jezús nia liafuan sira klaru liu; buat ne'ebé la klaru, ba eskolante sira-ne'e nia mentalidade, maka Mesias nia dalan tenke liu husi krús no husi saran an. Mate, iha eskolante sira-nia perspetiva la'ós dalan ba vitória. "Inkomprensaun" ne'e, idéntiku ho "diskordánsia": iha sira-nia laran sira la konkorda ho dalan ne'ebé Jezús hili, basá sira hanoin katak dalan krús nian maka dalan frakasu nian. Maski sira la konkorda, sira la barani atu kritika Nia. Karik sira hanoin Jezús nia reasaun bainhira Pedro, depoizde anúnsiu dahuluk, husu Nia atu keta aseita Aman nia projetu (kf. Mc 8,32-33). Parte daruak (vers. 33-37) lori ita ba Cafarnaum, "iha uma laran" (Pedro nia uma?). Hahú ho Jezús nia lia-husun ida ba sira: "Imi haksasuk malu kona-ba sá loos tuir dalan?" (vers. 33). Kontestu sujere katak Jezús hatene didi'ak kona-ba tema diskusaun nian. Karik nia rona buat ruma iha sira-nia dada-lia no hein oportunidade loos – iha hakmatek "uma" nian – atu esklarese sasán no kontinua instrusaun ba eskolante sira.

Iha pontu ne'e de'it maka Marcos informa ninia leitór sira katak eskolante sira haksasuk malu, tuir dalan, "kona-ba sé husi sira maka boot liu" (vers. 34). Problema ierarkizasaun fatin no ema nian maka problema sériu ida iha sosiedade Palestina tempu ne'ebá nian. Iha assembleia sira, iha sinagoga, iha bankete, "orden" apresentasaun ema nian rigoroza liu no dala barak hamosu konfliktu naruk se ba kontra protokolu ierárkiku. Eskolante sira nakonu ho lójika ida-ne'e. Se Mesias hakbesik daudaun ba ninia triunfu no sira sei simu fatin-xave podér nian iha reinu mesiániku, presiza iha kadru ierárkiku ne'ebé klaru. Maski Jezús foin ko'alia kona-ba dalan krús nian, eskolante sira lakohi husik sira-nia mehi rasik, mehi materiál no sira-nia lójika umana. Jezús ataka problema ne'e iha oin no ho klareza hotu, basá buat ne'e afeta ninia proposta nia esénsia. Iha Jezús nia comunidade la iha kadeia ida iha ne'ebé balun iha leten no sira seluk iha okos... Iha Jezús nia comunidade, ida-ne'ebé boot mak ida ne'ebé serve no oferse nia vida ba maun-alin sira (vers. 35). Ho forma ne'e, Jezús soe ba rai pretensaun hotu podér nian, domíniu nian, sai ema boot nian, iha comunidade Reinu nian. Eskolante ne'ebé hanoin lójika podér no naran boot nian (lójika mundu nian) nia estraga Reinu nia orden.

Jezús kompleta eskolante sira-nia instrusaun ho jestu ida... Foti labarik ida, tau iha grupu nia klaran, hakohak nia no konvida eskolante sira atu simu “labarik sira”, basa sé maka simu labarik ida simu Jezús rasik no simu Aman (vers. 36-37). Iha sosiedade Palestina nian iha tempu ne’ebá, labarik sira la soi direitu ida no iha pontudevista legál la vale buat ida (pelumenus enkuantu seidauk halo “bar mitzvah”, serimónia ne’ebé defíne hola-parte ba Maromak nia Povu). Nune’e, sira maka símbulu ema kbiit-laek sira-nian, ki’ik sira nian, sira laho direitu ida, kiak sira, defeza-laek, insignifikante sira, marjinalizadu sira. Sira ne’e maka loos duni, Jezús nia comunidade tenke hakohak. Iha kontestu Jezús nia dada-lia ho ninia eskolante sira, Jezús nia jestu signifika: Jezús nia eskolante sai ema boot, bainhira la iha poder ka autoridade iha sira seluk, maibé bainhira hakohak, bainhira hadomi, bainhira serví ki’ik sira, kiak sira, marjinalizadu sira, sira ne’ebé mundu rejeita no husik mesak.

Iha ida-ne’ebé ki’ik no kiak ne’ebé comunidade hakohak, iha ne’ebá iha Jezús rasik (ne’ebé mós sai kiak, fraku, defeza-laek).